茹淡论

或问:(内经)谓精不足者,补之以味。又曰:地食人以五味。古者年五十食肉,子今年迈七十矣, 尽却盐醯,岂中道平?何子之神茂而色泽也?曰:味有出于天赋者,有成于人为者。天之所赋者,若 谷、菽、菜、果,自然冲和之味,有食人补阴之功,此(内经)所谓味也。人之所为者,皆烹饪调和偏厚 之味,有致疾伐命之毒,此吾子所疑之味也。今盐醯之却,非真茹淡者,大麦与栗之咸,粳米、山药 之甘,葱、薤之辛之类,皆味也。子以为淡乎?安于冲和之味者,心之收,火之降也。以偏厚之味为 安者,欲之纵火之胜也,何疑之有?(内经)又曰:阴之所生,本在五味。非天赋之味乎?阴之五宫, 伤在五味,非人为之味乎?圣人防民之具,于是为备。凡人饥则必食。彼粳米甘而淡者,土之德也, 物之属阴而最补者也。惟可与菜同进,经以菜为充者,恐于饥时顿食,或虑过多,因致胃损,故以菜 助其充足,取其疏通而易化,此天地生物之仁也。(论语)曰:肉虽多,不使胜食气。(传)曰:宾主终日 百拜, 而酒三行, 以避酒祸。此圣人施教之意也。盖谷与肥鲜同进, 厚味得谷为助, 其积之也久, 盛 不助阴火而致毒乎?故服食家在却谷者则可,不却谷而服食,未有不被其毒者。(内经)谓久而增气, 物化之常;气增而久,夭之由也。彼安于厚味者,未之思尔!或又问:精不足者,补之以味,何不言气 补?曰:味,阴也;气,簰也。补精以阴,求其本也。故补之以味,若甘草、白术、地黄、泽泻、五味子、 天门冬之类,皆味之厚者也。经曰虚者补之,正此意也。上文谓形不足者温之以气。夫为劳倦所伤, 气之虚,故不足。温者,养也。温存以养,使气自充,气完则形完矣。故言温,不言补。经曰劳者温之, 正此意也。彼为(局方)者,不知出此,凡诸虚损证,悉以温热佐辅补药,名之曰温补,不能求经旨者 也。